

Financiamiento cancha deportivo Centro Juvenil Tanki Leendert ta cla

Groundbreaking dia 22 di October

ORANJESTAD (AAN)- Dialuna dia 10 di October a keda firma e acuerdo di financiamiento di e renovacion y expansion di e cancha deportivo na Tanki Leendert entre e directivanan di Cede Aruba (Centro Mediador pa Co-Financia Projectonan di Desarrollo) y Centro Juvenil Tanki Leendert.

Den su totalidad e proyecto lo costa 99.560 Florin, di cual 74.670 Florin ta worde cubri via di Cede Aruba y Centro Juvenil Tanki Leendert lo mester cubri 25% cual ta 24.890 Florin.

E renovacion y expansion di e cancha ta encera renovacion di un parti di e cancha y cura existente; construccion di un cura; ponemento di asphalt grof y fini; y ponemento di luznan profesional.

E expansion di e cancha aki ta nifica cu e cancha actual lo worde redobla, di manera cu e cancha ta bay sirbi tambe pa

practica e deporte di futbol di sala. Banda di esey e grandura di e tereno ta pone cu tres tereno pa volley, basket, etc. ta worde crea.

E proyecto aki no solamente lo marca historia pa e comunidad di Tanki Leendert y vecindario, pero e lo mester bay demostra cu e pueblo ta para completamente tras di e construccion aki.

Pa tene e gastonan mas abao cu ta posibel Centro Juvenil mester a tuma e parti di construccion di e cura (cual ta encera fundeshi, ponemento di bloki, basha ringbalk y pilarnan, verf, etc.) na su encargo, pa cual ayudo voluntario di e pueblo ta worde spera.

Directiva di Centro Juvenil Tanki Leendert tin e pleno confianza cu mescos den pasado e pueblo a coopera pa Tanki Leendert haya un kapel, un school basico, un kleuterschool, un Judo Center, e biaha aki atrobe pueblo lo coopera pa realiza e proyecto aki.

Cu ayudo voluntario di hendenan di Tanki Leendert y

vecindario lo mester por construi e cura aki. Di awor aki caba directiva di Centro Juvenil ta pidi pa tur esnan cu ta interesa pa yuda como voluntario acudi cerca directiva.

Pa loke ta trata e resto di e proyecto e ponemento di asphalt ta den man di Thiel Corporation N.V. y ponemento di luz ta na encargo di Bopel Technical Services N.V. E mapa a worde diseña pa e arquitecto T. Quantus.

Diasabra dia 22 di October e groundbreaking lo tuma lugar, dunando asina inicio na e construccion di e cancha. Intencion ta pa promer cu e aña aki termina e proyecto keda cla.

En coneccion cu e trabaonan cu lo worde realiza, directiva di Centro Juvenil ta tene di 14 di October 'venidero, esta Diabierna, un atardi di informacion pa pueblo di Tanki Leendert y vecindario.

Henter e pueblo ta keda cordialmente invita pa asisti na e atardi aki y asina haya mas informacion encuan to e proyecto aki y otro plannan cu e directiva tin. Na e ocasion aki tambe

voluntarianan pa yuda construi e cura por duna number, mescos cu otro interesadonan cu kier traha den un di e comisionnan di Centro Juvenil.

Despues di e reunion aki Mariachi Unidos lo deleita e presentenan cu nan musica y pa e muchanan tin poppenkast di Sra. Eta Geerman. E atardi di informacion aki ta cuminsa di 6'or di atardi y ta bay te 9'or di anochi. E lugar lo ta na Centro Juvenil Tanki Leendert mes, o

sea "Barak".

Directiva di Centro Juvenil ta spera di topa cu hopi hende dispuesto pa yuda. Cu realizacion di e proyecto aki Tanki Leendert y vecindario lo bolbe mira luz despues cu pa hopi aña tabata existi un scuridad enorme, pa loke ta trata deporte di sala of cancha. Sigur e cancha aki lo bay ofrece grandi y chiquito, joven y bieu un oportunidad pa practica nan deporte di preferencia.

Lista di seleccion di Aruba Lifida

ORANJESTAD (AAN)- Fin di e luna aki lo tuma lugar aki na Aruba e prome torneo internacional di futbol infantil.

Un total di 24 jovencito lo forma e seleccion aki. Nan ta Shahairo Ras, Rudolf Duyn, Jurrick De Cuba, Edson v.d. Linde, Jairon Odor, Louis Webb, Gerald Geerman, Elvis Tromp, Ryan Figaroa, Omar Maldonado, David Leung, Alberto Kelly, Henry Tromp, Roland Rodriguez, Jean Carlo Arends, Melvin Bastien, Alberto Falconi, Wilfred Martijn, Terence Angela, Edgard Vrolijk, Eugene Kingsale, Junior Casuela, Wander Gross y Ferdinand Ponson.